

珂雪齋近集

珂雪齋近集卷之八

公安 小脩 袁中道著

祭孔令君文

代

哀哉如公之不壽真不可解予等真欲詰之造物而無由者公既取科第茹蓼之苦受于五十年前而食蔗之樂宜安享于五十年後者而今殊不然此其不可解者一公之爲慈父母也合一邑而乳哺之至如催科一事往年鞭朴無遺力公至而輸將惟恐後軫念小民若將傷之諺云千人所祝豈不蒙福仁者之壽非公家司寇語耶而今若此此其不可解者二公

雖居公有如寒士自常祿以外纖毫不取政成三年而囊橐如洗不能名一錢夫畲取于人者宜豐其社于天而今也尚書虎瓜之板幾下而先已不祿此其不可解者三公資用甚淡臃脰之味不薦于前粉黛之姬不列于室飽伊蒲如頭陀妻禪悅如衲子妙合長生養年之旨而竟亦不壽此其不可解者四天乎第矣第而未榮之可也不然不第矣而使之安享故里考終正寢亦可也胡爲乎畲之數十年而晚予一第甫得一第不數年而卒于官歷黃牛白馬之波而始得至赤甲白鹽之下蕭蕭丹旄茫茫煙水路人猶

爲下泣而况受其恩紀者乎此其不可解者五試以此五不可解者問之造物不知造物將何以應也邑中否運漸至去年失袁中郎今年又失慈父母天乎不令爲善者怠耶前年予等計偕晤中郎詰所以得賢父母之故中郎曰予以邑事廢弛之甚曾乞一制科于當事者當事者諾之然實不熟孔令君無專乞意也令尹宜爲司理而掾史舞文寘之令籍中唱名時令君以宜爲司理意白之當事當事者心知受掾史欺托袁中郎相乞之意以解卽予亦竟不復明之也中郎言之予等始知之然予等知之而公仍未知

也今且逝矣夫公宜爲司理矣乃得令又得公安令以百孔千瘡之邑三年勞瘁神傷體憊邑民何幸而公則已苦矣此造物之尤不可解者也意者惟蘭玉在堂將來聯翩取科第以報善人耶歲云暮矣一帆寒雪予等祖送國門涕淚如雨哀哉哀哉尚饗

告十弟間田文

萬曆辛亥十一月之吉愚兄中道謹告于簡田十弟之靈曰哀哉吾弟人誰不歿誰無夭折獨汝旣舉孝廉先七十餘歲老母而歿使其乍慶乍吊如登樓去梯此幾許苦痛也况變出意外家道貧窘乃以汝所

制伯母之棺先以瘞汝此棺係汝三千里外硯田舌
耕所得奔波年載乃成茲事汝自謂祿養尚遙恐老
人難待借此聊申人子一念誰知今日汝先將去愚
兄知汝雖在九泉亦必斷腸傷心千劫不化也已矣
已矣哀哉吾弟豈謂汝直心爽懷乃得此酷報耶愚
兄家貧不能代汝市一佳木中有深愧又恐老人當
此光景未能久延不得已以十三金易一棺以備緩
急設伯母壽考未艾愚兄稍有寸進必當市一佳木
以慰汝心決不食言其汝所留市棺之資及少吊賻
付素心親家掌管稍得利息供入口體粥有我及諸

異姓兄弟在決不令汝孤孀十分淒涼汝若有知稍
自排豁哀哉吾弟言與淚俱弟其鑒之

告中郎兄文

萬曆壬子五月初一日弟中道敬以葵蔬之具致祭
于六休兄之靈曰哀哉吾兄去世之期已歷三紀而
弟尚無一言哭吾兄也弟非不言也自兄庚戌九月
初六日下世弟于初九日得血疾幾至不起醫者云
鬱極所致一哭必大嘔不止有性命憂弟以兄爲命
相隨地下快矣何更求生而又有不得不求生者則
以堂上有太人也大人年已七十初喪伯脩旣喪吾

兄弟又溘先朝露令老人何以爲懷弟是以勉強排遣藥餌不效則走之玉泉山中看山聽泉期日久日忘以消此苦懷庶宿疾不發凡一年餘弟始有生望而大人以哭子斷腸逝矣痛哉痛哉大人旣逝第料理後事及營功德完始念子職粗盡乃敢爲一言以哭吾兄哭吾兄而觸舊病而死隨大人與兄于地下猶羽化也嗚呼吾兄三不朽事業已成而浸浸乎其未有涯也乃遽逝耶以出世則得千古不傳之髓而盡離蓋纏以用世則圖不見不聞之功而盡泯朕迹以垂世則傳古人脩詞之神而盡去剿襲此弟所深

知而兄所自負者也學問兼悟脩矣而或疑其道不
勝習營綜兼明膽矣而或疑其嬾不耐事詩文極清
新矣而或疑其以才軼法此亦弟所深知而兄所不
自白者也自己酉冬庚戌春秋半載時時聚首論學
則常云須以敬持以澹守論用世則常云須耐煩生
事厭事等病論詩文則常云我近日始稍進覺往時
大披露少蘊藉此則弟獨知之而兄所爲日新而不
已者也不怠者道無盡者生經歷諸位磨鍊習氣天
上人間隨意寄托何憾何憾世間父子兄弟寧有異
情但兄于弟知己感恩更自不同追思種種疊弟之

語或以溺愛溢美弟不敢遽信而亦不敢不勉願資
學俱劣百分不及兄而懶不耐事之迹則肖之近日
家難體復多病雙眼以出淚過多不能看細字略思
慮心中怔忡不寧如人捕狀雙膝常苦寒夜則待鼠
子爲伴每應酬少勞則火從兩頰起滿大宅間發血
疾結習所使惟看山色聽泉聲則沉痾爲之一洗以
此遵兄遺命于玉泉脩一蘭若祠兄而已脩靜其中
念種種業緣于此生總似啖刳吞椒近更欲留色身
教養後生有所闡發補二兄最後一段光明故急走
入山玉泉精舍已有次第尚平平耳清溪水色如碧

玉甕苑諸山如破雲裂霞宛如向所見李太將軍青
綠山水視吳越諸山便如妖姬之視老嫗鹿苑尤奇
有七渡流水至寺卽陸法和舊邸因山爲牆前後有
山穴爲門戶使得兄寓目賚以妙墨不知山川作何
等映發惜不令兄見之彭年詩文大有驚人語雖微
有冶習無損英特第二男已作虎子跳地矣家計粗
安無可慮者今束裝入山玉泉舊傳爲諸僊翔集之
處幽明雖隔兄必來止弟尚不寂寞也嗚呼哀哉

上林苑魯公心印墓石銘

萬曆戊子申郎舉于鄉時年二十予年十九尚共居

長安荷葉山舊第汾河魯鴻臚印山偕其子心印來
稱賀時心印又少予三歲肌如玉雪鬢髮脩眉媚好
可愛癸卯予舉于鄉去戊子十六年予訪印山父子
于汾河里第心印肥碩強壯松停栢峙居然偉丈夫
較前蒼老且愈沉靜少時頗疑其非壽者相今可無
虞心竊喜會其子已成長未婚予有弱息遂字焉蓋
魯氏世豐厚然取息甚輕里人無怨印山以文酒自
適有花木園亭之娛興致翩翩不俗而心印真淳篤
實渾厚細密生男穎慧又知向學予知魯氏之澤未
衰故欣然締好丁夫予下第寓漁陽則印山已辭世

予從漁陽歸聞心印病甚不數月而父子相繼亡矣傷哉心印性靜定寡咲言不好玩弄長日靜坐旁絕妻勝頗知節嗇暗與養生之旨合而不壽可嘆也少能文印山翁艱子息不令其苦學遂入貲爲上林署丞印山翁去世心印哭之過痛病緣此又甚可憫公諱號心印其先爲承天景陵人有魯文秀者爲祭酒魯文恪公弟以貢司訓澧陽遂家焉宅于潯水至西溪公始大饒印山起家諸生業不就入貲爲京秩稍顯貴矣先世皆有隱君子之德後之人知向學魯氏其未艾也公生于萬曆壬戌卒于萬曆戊申得

年僅四十七父卽印山翁母 氏妻劉氏司農大夫
福井先生女孫男一名煇卽予偕女某某今以戊申
臘月三十日葬于馬湖之陽公與予髫年相與又爲
至戚且有隱德焉是皆可銘銘曰

靜者延胡無年仁者延胡不全豈其天

袁母鍾太孺人墓誌銘

先王父左溪公弟爲松峰公兩王父慷慨然諾周人
之急其德相若其少壯艱子而晚得令子亦相若也
嫡或後字或不字而側室生丈夫子各一人又相若
生子父者爲余氏姑生子叔者爲姑其賢又相若也

先王父嫡于丘而余姑事之得其歡心先叔王叔嫡于田而姑事之亦得其歡心其婉順相若先王父之嫡久厭其家政而以余姑代先叔王父之嫡久亦厭其家政而以姑代其才相若嫡晚生子而乳嫡之子如其子嫡無子而乳他姬之子如其子其不妬相若先王父卽世而予父不知有家得下帷讀書補博士弟子員先叔王父卽世而予叔不知有家得下帷讀書補博士弟子員其母儀相若及其老而強健疊見諸孫成立余姑及見予輩成立并予輩子姑及見宗伯弟輩成立并宗伯弟輩子其福祉又相若年皆至

八十余安詳而逝神明不亂若有道者其考終又相
若也嗟呼袁氏之興皆有賢母焉世道日降而彊悍
嫉妬則相若耳鳳靡鸞吡鴟梟叢集可嘆也按狀姑
笄而事松峰公後生予叔一人名錦諸生孫二人名
宗伯諸生宗夔儒士孫女一人適曹近臣曾孫五人
詹生達生樂生永生衛生曾孫女二人皆幼姑生于
嘉靖壬辰年三月初一日卒于萬曆庚戌年九月二
十五日享年七十有九今以本年十二月二十六日
祔葬于松峰公之側而侄孫中道爲之銘銘曰
蘭生香石生堅姑之賢本于天德無虧壽亦全懿行

在彤管編鬱葱葱嘆此阡名與銘億萬年

玉泉寺十方禪堂碑文

萬曆中去當陽玉泉之一舍許沮漳合流之間有居士名曰乘舟字慈航姓任氏初爲豪俠自喜之行後乃頓改初服歸心三寶以其居爲粥飯舍以待四方之行脚者壬寅歲西川黃太史平倩先生公安袁吏部中郎先生訪無跡法師于玉泉過居士之廬目睹其脩擅度也而嘉之且謂之曰玉泉爲天下四絕之一今法門草深矣卽行脚者竟無一栖息之處居士何不以此願廻施于堆藍勝地庶垂永久乎居士合

瓜曰諾是時度門法師無跡方有勝願脩玉泉大殿居士亦與效一臂之力殿垂成矣居士乃謀于玉泉住持于殿之右有空閒處薙草去石以爲菴基取黃袁二公及諸宰官居士所檀者遂先立十方堂一處十方行脚者始有寧宇并鬻田四百餘畝以爲供衆資行之數年居然藥山往日僧郵光景矣居士復嘆曰自大殿脩成金像糾容光明照耀佛寶具矣十方菴成往來龍象絡繹不絕僧寶集矣夫未有三寶不全而可以成阿練若者乃備資糧與無跡法孫法宣入京同請龍藏時無跡法門白衣弟子宋侍中得無

跡老人書多方效力遂得如願自是法寶燦然畢萃
矣三寶旣具叢林一新卽垂之千百年可以不毀而
居士念年已遲暮恐前後不相繼有負宿願覓所以
不朽者于予予曰斯地也爲十方設也諸宰官居士
不得而有也玉泉常住不得而有也什慈航居士亦
不得而有也夫諸宰官居士輩行檀度于十方卽有
結白社之緣者豈乏買山之資而戀戀此一袈裟地
爲也故曰宰官居士不得而有也玉泉香火之田自
前代以來于今不絕則袈裟院中各有資生之業旣
無一粒一盂以及十方而諸宰官居士所共設以待

十方人者又可認爲寺中物乎故曰卽玉泉常住亦不得而有也十方堂之設雖慈航有所檀施而諸宰官之檀施爲多慈航因而卒成之耳旣爲十方常住卽當擇十方之高賢爲主而已不與焉蓋古人創脩一處必不久居不惟一餐一宿桑門遺風亦以避借他自利之嫌故也故曰卽慈航居士亦不得而有也夫今之檀施宰官居士固皆深信因果者也其有指旣捐之財爲己物者固萬萬無有設異世之後宰官居士之子若孫有不識祖父遺意而妄認一草一木者予以謂佛法不容也卽王法亦不容也今玉泉見

在本寺之僧亦皆知有因果者也其有指十方之叢
林爲本寺物者固萬萬無有設異世之後相繼之比
丘弟子有懷貪心而認十方之一草一木以爲己寺
有者予以謂佛法不容也卽王法亦不容也今慈航
居士任氏俗門之子侄亦皆知有因果者也卽居士
之施于僧者俗不得與而况非居士一人之施乎則
其睥睨助道之資破壞和合之衆者固萬萬無有設
易世之後任氏之子姓有懷貪心而竊認一草一木
以爲任氏物者予以謂佛法不容也卽王法亦不容
也夫明有護持幽有鬼神今宰官居士固爲此地金

湯後之相繼者豈無人乎敢有紊十方法堂規制者
三尺具在誰能庇之此明有護持不可干也夫此地
非武安王精靈顯赫地歟王無所不在而實宅神于
此且職司護法誰能容壞法之人考之雲溪友議載
玉泉有三郎祠卽關三郎也人之誠敬者彷彿似睹
之厨中先嘗食者頃刻掌痕出其面雖近時不聞聆
響而冥冥誅誣實屬神威如往年乾沒玉泉大殿貲
財立取凶夷者可鑒也此幽有鬼神不可犯也以此
觀之卽有欲爲菴中之蠹者且將息心焉諸蠹旣絕
而慈航惟擇一十方高僧以授之以完黃衰二先生

付囑遺意卽與浩劫同久可也何必別求所以不朽也哉會慈航來覓記于予予遂書此意以勒之石并以告見在未來若僧若俗知有因果者云

普仰寺大士殿乞檀文

天下名勝無如東南之秣陵虎林夫秣陵虎林之所
以稱勝者非獨以其金湯壯麗閭井殷盛已也實以
山川秀媚甲于天下乃其山川秀媚所以甲于天下
者又不獨以其叠叠之山湛湛之水已也實以鷺頭
鶴林之寶地赤花青豆之精廬頂背相望粧點湖山
假使秣陵無長于天界牛頭燕子諸刹則秣陵不勝

矣假使虎林無上下天竺龍井淨慈諸刹則虎林不
勝矣楚中江陵沙市其地殷富爲五方之大湊不下
于秣陵虎林卽無東南層峰疊嶂而大江之永縈迴
曲抱九十九洲星列碁布乃世之游人客子譚吳越
則色飛而譚沙市則黯然者何也夫有之用實實鄰
俗無之用虛虛鄰清沙市士有社商有屨工有肆止
有居客有郵實之以爲用者可謂備矣獨爲佛舍者
僅二而日汗之削之所謂無用之用清虛之境爲河
山浣洗俗氣者何其蕭然也則其遠不及秣陵虎林
也固宜今夫人面之有眉至無用也其不如目司視

耳司聽鼻司臭舌司嘗之有用也審矣而眉乃以其
無用者踞于耳目口鼻之上而獨處其尊有美丈夫
于此以爲吾有耳目口鼻足矣安所需無用之眉而
剪除之汙垢之有不至投礫者乎沙市固輿地中之
美丈夫也士農工商各有寧居諸根備矣獨普仰龍
堂三寺爲沙市面上之雙眉而今者日以殘破夷削
甚且有如眉裏千巾幘之中而不復舒至于普仰大
士一殿以喧襍故致付南陵使者眉嫵旣壞不復成
妍沙市日就寢陋亦覽勝者所深惜也夫因果之說
聚沙剪楮皆爲勝因無俟言矣卽以一方形勝竟無

一佳蘭若以爲瞻敬衍息之地真成闕典願同緣者
卽捐所剩莊嚴鴨脚大士舊日道場爲此方脩飾眉
宇得如秣陵虎林之萬一則幸甚矣

募鑄沙市觀音閣丈六金身疏

沙頭接引之塔于梵教爲率堵坡于吾教爲文宿有
耆舊云此地若舟塔若帆趨于江若掛帆而去者
須得一丈六金身作鎮乃可以留屯冲氣含貯靈脉
不惟像教不至消歇卽宦此土此者虎爪之板頻來
尺木之翳相望恒必由之且夫石函鐵券神州天府
玉海金堤東南上都琵琶餅餽措大鯽魚豈不殷盛

邇年以來漸虞淪落若夫煌煌朱邸槁易秋蓬赫赫
黃扉燼速流火下至龍門頻點鴈塔稀題良由載輕
不禁浪泊江門不扇地肺橫搔非人天道師宿願深
弘必不能鎮礎浮囂禪壓大地時有脩徧吉行者欣
然以爲已任且謂此地精銅如土不減南山海內靈
相從茲冶鑄者項背相屬而境內闕焉何知出聚沙
童子下也予偶過塔下聞而善之拜書其事以告行
檀度者

龍堂寺藏經閣乞檀文

釋家正法雖衰象法猶存其蹂踐狼籍污穢荒蕪未

有若沙市之龍堂者也寺舊有歲寺僧欲脩閣貯之
予問之曰閣之成不難但不知閣成之後諸比丘能
不以五辛氣薰蒸此閣能不乘沉酗入此閣否僧曰
近日諸僧粗知戒相若閣既成而破律如故者王法
律法俱所不容予又問之曰能不使無知商賈携妓
來游閣下污三寶地否僧曰閣成卽設禁約亦可止
也予又問之曰能不使措大帥諸猢猻占作書房抄
竊貝葉否僧曰近日諸賢亦知護法卽有欲占作書
房者寧不惜身命守之可無慮也予曰能如是乎予
之疏

當陽報恩寺募藏經文

佛法僧三者如六三點非一非三至乎後世金銅土
木卽佛也圓頂方袍卽僧也楮墨文字卽經也未有
三者不具而可稱阿蘭若者名寺大刹法藏凋殘者
年高僧多請於上方煌煌貝葉傳之不朽若今之
時可謂盛矣卽深山邃谷中有志衲子亦多以具典
不具爲憾予以此知佛法之漸明也或曰學佛在參
求耳不立文字曷取文字予曰古之悟道者多由文
字圭峰從圖覺發悟玄沙從楞嚴發悟如此類者甚
多文字何礙人自爲文字礙耳玉泉已有藏獨報恩

闕焉老衲閱空戒德精嚴居報恩百廢俱興予所謂有志衲于是也夫脩一切功德者須得其人乃能成如意果幸有閱空能爲人作福田布種植根正其時也行檀度者其速成之無怠

當陽紫蓋寺講經檀文

蓋聞大道虛玄雖超文字而此方教體實用音聲故宗說兼通行解並進如鳥兩翼如車兩輪歷代以來無偏廢者至于今日雖祖庭秋晚法堂草深而講席之盛莫如神京名理之傳旁逮吳越惟遐方與滌此道闕焉在守儒家之三尺者不難用瓦泥塞其門戶

而一二有識者則又謂補偏救弊王道之所不廢何者三教門庭不同歸于使人爲善故貝典之設不惟性命之旨可以超出塵勞卽因果之說亦可化導頑冥懲噎廢食豈通論歟當陽紫蓋寺者峰巒泉壑荆郢間一洞天也始則葛仙公煉丹敷三芝九籥之秘繼則天皇悟雨法傳一花五葉之宗盛衰遞遷久矣凋謝邇年以來一二開士漸脩律儀解浮囊之可珍知德龍之足寶鴟夷絕跡猗猶不聞且也登其殿則聖相爛浮檀之金啟其閣則貝葉標銀印之記三寶粗具練若改觀予以撥雲瞻巖越于三藏閣下偶語

開士曰聖朝頒此靈文非徒束之高閣正欲往山衲
子借此法雨溥彼心畦且令聞者見者一歷耳根永
爲這種若何重重扃閉付之胷望已也諸開士云微
居士言僧等固欲請之屬有所需未能也予歸未及
年而山中道侶過我椒園以講事見詢且曰資糴粗
備不敢辭十方之檀而亦可不全資于檀考時可矣
予曰時乎時乎此中有異緣焉蓋有大護法之宰官
有眞說法之沙門然後可以成此勝事今邑侯以菩
薩心行方便事參王法以佛法寓出世于泊世教中
金湯非公而誰所謂大護法者非歟至于本邑度門

法師古之生聲類也南北經筵隨地用法今者高謝
塵囂歸隱空谷彼非如麀獨跳不顧後羣者若慙慙
啟請必不憚宣揚自當使天花亂澍頑石頭點所謂
眞說法者亦其人矣若一二士大夫般若甚深解悟
已久深厭塵土醉心煙霞俟講席甫開之日必且尋
桃花而問津分青豆以半座予是時亦當從邑中師
儒孝廉文學之後觀龍象之蹴踏聆箭鋒之交注則
眞能聽法者亦自有人焉此予所謂異緣者也時乎
時乎不可失也諸開士欣然如命乃定以初春之吉
肇舉盛事而令予書其顛末以告十方諸檀越云

荊州天皇護國寺募接待檀文

唐初荆南有二寺一名天皇寺一名天王寺其住持二人皆名道悟居城西天王寺者嗣馬祖其法嗣爲龍潭信信後爲德山鑒自德山一棒如雲如雨至今鼎州香火之盛甲于天下而不知一瓣香尚當屬之今西城天王寺也其居城東天皇寺者嗣石頭其法嗣爲慧真文貴幽間卽今城東護國寺是也傳燈錄不深考乃以天王天皇合爲一寺二道悟合爲一人而以龍潭德山爲天皇道悟之脉謬矣今城西天王寺久已不存而屹然獨峙惟天皇寺耳昔盛今衰可

慨也哉袁子曰人知釋之福儒而不知儒之能庇釋也茲寺之在梁也張僧繇畫十哲于壁人頗疑之及魏人滅法毀教江南諸刹無得免者寺竟以先哲免難此儒能庇釋之明驗也今寺漸荒落法堂前草深一丈去天皇悟時光景遠矣夫近時之士大夫皆誦法孔氏者也所望創僧廬市僧田以招致撥草瞻風諸龍象者亦惟誦法孔子諸賢是賴則儒之能庇釋也不信然哉若夫佛之庇儒與庇一切有情大恩難報鴻毛丘山予不復言之矣

重修義堂寺檀文

邑之勝萃于里里之勝萃于先人墓田之間先人墓田之間有古剎焉雄峙于蒼山碧水之中亦勝跡也自伯脩爲諸生時從父叔伏臘上冢墓見其傾圯輒懷脩葺之志及出任爲從官其志益堅然欲待官稍高祿稍厚時成之已而伯脩往矣十五年之間卽先人馬鬣之處華表翁仲闕然無有況能及佛舍乎蓋忽然無異電光之一耀也予少有奇氣每見此剎輒自念我不久當富貴或爲國家邊陲上建少功業盡以上方所賜緡錢及每歲祿入脩葺此地請于朝易以報本之額以資先夫人冥福然後辭將相印歸

田向寺前銀杏樹下作一老頭陀此予志也今予之顛毛亦旣種種矣天下事可復知乎顧此刹不獨伯脩中郎及予願脩葺之也自吾叔蘭澤雲澤先生携諸弟來此脩業皆欲脩而皆有所待夫待之誠是矣必有所待而後成乎俟河之清人壽幾何且伯脩不旣貴顯乎而猶然抱空願也故曰需者事之下也今族中里中衣冠日盛而刹中又多戒僧以其時考之則可矣顧其費不訾非一人一家一族一方一邑之所能辦也用重者舉輕豈不然乎乃分遣戒僧乞于四方之大檀越焉若夫前因後果之說信而有徵予

不復言之矣

當陽玉泉寺柴紫菴募接待田文

柴紫菴在玉泉寺右掖別開一嶂其中有堂祠法門
金湯有功德于玉泉者若黃平倩先生及予伯兄伯
脩仲兄中郎諸公其開山卜築則予以綿力爲之者
也旣落成以付之度門跡公之孫玄徹宣逾年玄徹
告我曰凡蘭若者具三寶者也今佛殿脩矣藏典備
矣獨往來雲水聖賢尚無一粥飯棲息之地山僧歎
竭力募數百畝田以贍行者謹謀之居士予乃語之
曰宣上人爾祖起自草萊徒步上國立談而使玉泉

頽墮之梵宮化爲寶地珠林至于汝又何難寘數百畝之田爲十方鬻飯資也哉良工之子耻不爲箕勉之矣上人色力強健更事營綜極密而于財利纖毫不苟是可以作十方主人者予嘉其志美其事而更以告之行檀度者云

募脩油口武安王廟文

千古忠烈之薨其靈爽母如王者王雖事蜀起晉而半生精力皆盡于荆則王之神雖無所不遍而荆尤忠魂所樂棲之地也荆之祠王也宜當烏林之役以後昭烈棲身公安而屯兵于邑之油河口今之孱陵

城卽孫夫人築也王業艱難之始王與諸將同心戮力枕戈待旦之處尤忠薨之所不能忘者則油口之祠王也尤宜且油水發源自石山至公安出江漢時尚爲巨浸桑欽著水經列于水牒今雖淤塞而三國之遺跡尚存則王之廟其從來遠矣今近江亦有呂蒙廟一圯之後竟無一人發心脩葺之者而王之廟自漢以來屢壞屢飭一順一逆向背昭然人心之不免可見今王之廟又漸圯矣王之靈爽千年常在而公安顯忠慕義之良心亦必不隨油水而俱塞其共成之哉

募脩刻木觀殿文

丁蘭者河內人也母沒蘭以木刻母貌祀之甚靈喜
愠望色隣人借鋤蘭適他出妻稟之母母色不允妻
辭之隣人知其故過扶木入蘭歸見母貌不怡訊之
妻大怒手刃其隣人事聞于官逮之蘭辭木人木人
墮淚逮者以聞官神而貸之遂上聞于朝竟荷朝獎
天下以其孝格鬼神相與屍而祝之至于今不絕事
該三教不宜專屬之道門第以至德精誠上帝所欽
諸仙所重卽屬之道門可也此觀之所由起也里中
舊有觀殿堂已圯先舅靜亭公施屋一所議拆去樹

立而舅氏亡矣表第晦伯等不忘父志竟如原議有
丁公不沒其親之遺意焉第繕脩之費尚自蕭然不
能無望于孝子仁人蓋二氏之說儒者之所不譚故
其不施也非慳也以衛教也今大孝蒸嘗之所爲儒
門之所首重正諸儒攘臂捐貲時也急相與共出金
錢刀幣以廣大其室宇而恢廓其垣墉使一邑之人
皆曰儒者之舉動果何如哉向爲闕邪則主慳今爲
崇孝則主施慳施得宜所以爲儒者也是疏出而觸
發一邑孝子之心舉數十年鬱而未施之財乘此可
施當施不忍不施之處而盡出之此一片地當與濯

龍青手諸處同一華整矣何幸如之

募脩大林寺禪堂小引

謂予與廬山有緣耶生四十五年矣尚未見此山真面目也謂無緣耶而山泉之勝常歷耳根卽今下大林如來金相曾與效一臂之力雖謂之有緣可也予栖心香光之業久矣安知非遠公舊法眷也得天根居士書并讀其疏益令人神往是必山水清靈之處有必不可無此一結構者當其目矚心怡之時有若饑渴之于飲食惟恐其成之不速也會心山水者當向此趣予雖貧不難典衣鬻書以供大厦一木其他

愛山水并深信因累者幸助成之

募沙市大江南岸草菴文

大江之險甲于天下非漢水黃河可比猛風乍起渡者多致不戒可怖可愍第大江誠險而人多迫之以卽于險何者當江風大起時渡者徘徊江干勢無復歸之理而又無棲息之處小人輕命卽冒風以渡故致有不戒使江上有一棲息之地晝食夜眠則亦候風微以渡不徑登舟何至沉溺予居舟最久頗知風候凡風起大者或七晝夜不休然鷄鳴時其勢必少衰至辰巳時復健故渡者息于此候鷄鳴渡江卽百

不失一然則此一片地數間屋成不知每歲採多少
性命所關非淺凡營功德當于急者徃時苦舟小邑
鄒君次江懇之陳君鳳宇作兩大艚渡者稱便若再
有一菴可候風則大江雖險而人事皆備無有迫之
以卽于險者此亦一大快也念淨居士與今十方菴
王川公大有此志造菴比造舟費更少其事必易成
陰德勝果之說皆此中人所常聞必有大發心者子
姑書之以告

書青蓮菴冊

嗟呼予又何忍見此冊也追思瓢杓之語予每言及

吾兄未嘗不粲然一哭而今已矣柳浪湖中六載匡牀東西南北形影相逐皆如夢中事矣予又何忍見此冊也冊中所言叮嚀若此而顯公猶有飄然遠去之意夫顯公果有飄然遠去之意是以逝者待逝者也不可也卽顯公留矣止于碧酣而不以遺命所捐之地寘一精藍是亦以逝者待逝者也不可也卽顯公真精藍矣而吾輩不爲作緣不爲護持是亦以逝者待逝者也不可也夫顯公以逝者待逝者不過于故交之誼有損耳若吾輩以逝者待逝者是爲不弟不孝不仁如是雖欲不留顯公不共成其精藍與護

持之也又烏忍耶且此地之來也予與祈年侄受直者也不得而有也卽彭年侄亦爲先人已捐之土而已奉其遺命者也不得而有也則已非袁氏物也乃顯公及十方物也雖然袁氏雖不得而有之而其祠于如來之旁者乃袁氏之爲父兄也伯叔也袁氏雖不得而有之又安得而不護持之也耶必也顯公王此菴袁氏世世護持此菴始爲不以逝者待逝者耳若夫深信因果之士以此爲白社因而助成之護持之也又何幸如之

昔通人李溫陵有詩云漢濱有父老試語藏身訣

因作詩寄之曰漢濱父老多奇訣數語雖存名不存
溫陵見而頷之蓋楚之隱君子雖多而姓名俱隱者
其隱最貴自漢濱父老而外屈大夫所遇之漁父亦
其一也屈子不得不憂漁父不得不樂屈子不幸而
留名漁父幸而不著名然隱若漁父清貴已極真令
人懷想景行而不能自己者也今汪君有隱德而匿
跡于市廛且自號曰隣漁其有漁父之思乎夫隱者
心隱也何分煙波何分市肆大隱居市汪君近之矣

書怡山蓮社圖後

古德云未有久住不行未有久行不住者遠公結社廬山不過虎溪數十年住可爲久矣然考其從安公南游樊沔時安公爲秦將朱序留之襄陽遂分遣徒各隨所之遠公乃始卓錫當陽今當陽之龍泉精舍是也從當陽之公安今之二聖寺舊爲安遠寺是也其後悅廬山之勝乃懷終焉之志則久于行而後住者今怡山遍叅已久年漸老大色力亦不甚健乃繪此圖自隨亦有久行思住之意焉豈其欲覓遠公之遺趾遵遠公之遺事脩香光之業乎效遠公者旣荷竿木前往效顰遺民者且繼踵來矣謹書以訂

書月公冊

昔晤龍湖老人于通州予問當如何作工夫龍湖曰
參話頭予曰某子甲半生參話頭而了無消息者何
也龍湖曰不解起疑也夫疑爲學道者之寶疑大則
悟亦大予近來尚有餘疑可惜不遇大作家痛與針
劑一番耳予心佩其言見世之道者終日恬然其稍
敏捷者隨口領略自謂已得始知老子所謂不解起
疑者真可見也古人云薄福之人不生于疑又云不
疑言句是謂大病今看古人因緣其穿鑿者無論矣
稍有所見淺者作逗塞情識會深者作探竿影草會

作仙人手中扇會遠之遠矣疑者叅之寶也理者叅之譬也所悟在理必不得力從門入者不是家珍耳月湖心地甚淨戒行甚穩講經論極精細而其中尤有不能自安者蓋亦有大疑也若盡擲去筭沙諸事而不受盲師輕爲點破則將來人天一隻眼矣何幸親見之

書瑞雲老衲冊

瑞雲祥公肇跡本邑南北遍叅已而住錫龍蓋山下邑大司馬王公及諸賢士大夫見而慕其宗風相與挽留之遂爲結菴以居造像施經粲然具備卽祥公

亦捨百城之志定交水上座矣古人所謂未久行而不住者也往年予偕曾太史及王氏諸昆過其菴中見其居山水之湊欣然留連不忍捨去及見祥公冒宇乃知其爲脩編吉行者今年祥公過公安視前老矣太史已化去而惟老衲屹然如故感惜傷今忽忽夢予謂祥公曰任山事體廢興主人旣創之不必慮其後也獨出家一番原爲續佛慧燈老衲向來編叅宗旨畢竟如何祥公曰山僧口門窄煩居士代一轉語予乃朗吟曰石牛面北走木馬向南征龍蓋天邊去繡林水上行祥公曰居士又爲虛空安耳穴

矣相與撫掌大笑因喜而識之并以爲贈

書見微請經冊

雪照道人自江左來晤予于貧簷谷道人云江左諸公發明格物尚未見親切不知居士作何意旨予曰我解格物只用家常茶飯實無新奇孔子所云學問思辨篤行卽格物入手處也質之佛學可以水乳合者不卽文字不離文字非博學乎南北遍參三上九到非審問乎研究至理以悟爲則非慎思乎大悟十八遍小悟不計數非明辨乎如理而行行解相應非篤行乎卽大慧中峰教人提話頭亦止是慎思中一

件事也然下手亦須博學古人千經萬論諸佛心印在其中可以起疑可以入悟故圭峰自圓覺入玄沙自楞嚴入此便是從文字入道榜樣也雪照頷之雪照之徒見微聞之若有當于心者曰學既不博問何由審遂附舟下江左請經

書葛洪井上毘盧閣造像冊

謂佛仙無二乎楞嚴所云十種仙者皆爲外道謂佛仙有二乎而劉向所記列仙傳中其七十人已在佛經則佛之示跡于仙者又未可以兩家論也葛先生之爲佛爲仙未可知然必欲岐之是亦戰鴻乙者耳

毘盧如來爲佛中尊等妙二覺不能窮其際况天曹
列仙乎然平等視之卽蟻塚之族莫不具此毘盧本
體而况其上者丹井之間有毘盧閣閣之上有佛闍
之卽成一家理固應然無足怪者成意以大願力欲
于郢結造像因緣予覬葛先生不能以丹砂與之姑
予之以唾霧君逢大力長者則字字皆丹砂也

書名公便面冊

便面一冊皆伯脩先生宦中交游諸公詩也中多世
外高人若卓吾石簣平倩詩書尤爲難得自伯脩居
京師凡伯脩所與交游者予皆得而友之庚子以後

伯脩去世友人相繼或逝或隱去年復失中郎寒鴈
一影飄零天末此中蕭颯豈可言喻小阮未央重檢
取裝潢示予于二聖寺智者堂竹下閣筆不忍細玩
嗚呼予雖欲不入空門其可得乎夫楮墨之中先太
史神理所寄未央當以淨水名香供養之不可輕以
示人爲寒具污却也

香猪贊

萬曆庚戌十二月之十一日予居沙市閒同病
子寶方過十方菴逢周居士念淨云其比鄰鄧
氏偶得償債猪一口數日不食欲殺之方礪刀

次而異香忽滿室徧覓室中無有則從猪身出也耳目口三處尤香予與寶方遂拉居士偕往觀之至鄧氏猪適在門殊馴擾予與寶方以手抹其耳有異香眼淚尤甚手至次早香尤郁然感而作香猪贊

含靈雖同報趣迥別或處于山或居于澤卽屬養物亦多蠲潔不淨之尤惟茲剛氣盤餐糞壤園觀溝渠喙與穢會身惟虱都專供鸞刀業報靡逾如何此畜忽出妙香香氣滿耳香淚盈眶香滿牙齒氣氤非常或云偶爾樂虛菌蒸是大不然茲實有情不同頑質

幻變無因或云爲災或云爲瑞或云宿業少福多罪
如比丘尼宿誦法華以破戒故後墮淫家以誦經故
口吐蓮花茫茫業海因果無差多生罪累感此艾豨
一念之善香氣交加是誠有之猶屬常見惟我大士
異類中現五臺薄荷冢中說法晁氏所書佛在齒頰
一月普攝印滿千江入流分身處處放光天見天身
龍見龍王蠕族蜎種蜎國蟻邦擊大法鼓建大法幢
維此異猪莫作鈍瞶亦非斗精亦非仙牧我方教體
純用聲音彼衆香國佛事香雲是大士者從衆香至
以香說法吸引諸類聞此香者普發深信是謂大士

說法已竟猗與此香旃檀難同旃檀之香但能逆風
不能使人心地開通猗與此香遠勝牛頭牛頭之貴
價直閻浮不能使人增長薰脩此香大士不可思議
如阿欵國遇不再遇嗟爾衆生日夜鼓刀一餐不肉
預憂腹枵豈知中有大士之曹何忍屠戮是烹是熬
有戒則香無戒則臭身是行廁心如糞豆香海浣洗
盪莫能救試觀大士芬香酷烈是何因緣可不努力
我來隨喜彌耳閉目雙淚橫流如見舊識以手撫摩
一宿猶熾矢心精進同歸香國和南作讚以代心勒

青溪雷說

遊青溪立龍女廟前有僧從其舍後門出一客謂隨
行僧曰此卽前日雷擊僧弟子耶僧曰是也予問故
僧曰今歲六月初一日大雨溪水暴漲浸僧後園僧
與弟子同出視水卽復入房取鋤授弟子雷卽隨來
與弟子遇釋不擊火着衣服皆焦直至房擊其師卽
死已立墻畔如一火燄蓑衣狀久之乃穴墻而出墻
邊有麥一大甕甕破麥植立不散雷旣去欲收埋復
震動醮祝後方得收予問僧此僧生平多作何事僧
曰其人亦無他過失蠢然耳蓋前因也嗚呼鬼神之
理其灼然不可誤也久矣古之聖賢未嘗言無鬼神

也而斷然以爲無者自宋儒始若其果無也彼立牆
畔如火燄蓑火者果何也偶值之又何以不擊其弟
子而必擊其師哉或者曰雷果有神世之作惡者亦
多矣何以不擊予曰天道在隱顯之間不可測可測
卽人道也非鬼神之道也若隱若顯而忽示以祥忽
示以威所以爲鬼神歟世之言無鬼神者其惑不可
解也則請視青溪雷事作青溪雷說

金陵街石說

洛陽石經蔡中郎所書凡四十六碑至范蔚宗所見
其存者僅十六耳自唐天祐中韓建築新城而石本

委棄于野朱梁之變剝守長安有幕吏尹玉羽者
白曰請輦入城剝方備岐軍之侵軼謂此非急務玉
羽給之曰一旦虜兵臨城碎爲矢石亦足助賊爲虐
剝然之乃移遷于城內此神物所以不爲瓦礫而至
今存者尹玉羽之力也宋天聖中詔營浮圖姜遵在
永興毀漢唐碑之堅好者以代輓轡當時有一縣尉
投書具言不可力懇不已至于叩頭流血遵以其沮
格朝命罷之自是人無敢阻之者遵因此得進用此
投書尉必佳士也寶愛舊跡至于叩頭流血以請而
不得以至失官亦甚可哀至今逸其姓名不得與玉

羽並傳則尤可哀矣予遊南都見其街多以青石爲砌瑩于鏡面有故老云此皆先朝舊豐石也予謂不然昔魏文取兩漢碑爲九華殿樓基識者已卜常塗之德不長況在盛朝寧有斯事姑無論聖明在上卽翊運諸公其識豈出白羽縣尉下哉六朝舊地物力原饒自多佳石且臨江水采取不難故老所傳不足信也

貞菟志

丁未予以下第寓京師時薊鎮督府蹇太保公理菴在密雲延予賓席太保公樂易愷悌待予若家人父

子閑則秉燭話言娓娓不倦也一日酒半酣公語予曰我初不信有鬼神事今始知其有并悟世間一切事皆有定數不可逃也予曰何也公曰我昔視山東學政時校濟南一府卷閱完列案已定俟晨發予夜臥甫下曉見一婦年可二十餘計跪寢室外頭面并衣服上血涔涔狼藉手伸一紙君哀顙狀予忽驚醒自云偶也復眠如故頃之前帶血婦人復來狀若前予醒自念曰此古署也豈老鈴下及宋無忌之妖耶抑冤抑也卽有冤抑我衡文使不治獄胡爲來呼侍史明燭予復臥頃之則向婦人復伸紙室外其貌不

異也而愁慘之狀有加矣凡三至以爲醒耶差不類以爲夢耶又了了無昏沉相予是時雖不知婦人所言寃者何事而知其決爲諸生妻以寃死無疑也遂整衣起坐中堂呼吏王暹問諸生案中有緣事者否吏曰止禹城縣生郝琚前以殺妻死降青衣今考二等應復廩予徵其牘曰在濟南道止批詳簿在此閱之不具顛未止見前學使周鶴臯公有批詞擬償而後寬之緣此生素勤學屬邑及諸生多方湔雪止革其廩予乃取案所註復廩塗之吏曰謂條約何子曰吾自有說吏默然予是時雖不悉郝琚所以殺妻之

故而知其以無辜殺妻死無疑也辰起案出楚人吳
文學率諸生爲琚請甚力且謂其貧而苦學須此廩
自給予不之許且微咲諸生相視以目若悔來者予
以夢中事涉怪終弗言遂罷去後抵省取原牘盡閱
之乃知郝琚娶妻孫氏爲婦生二男貧寒相依無異
故琚與羣儒結社講業是年將大比士琚咲謂友人
路宗商曰今年我必得附鄉書宗商曰果也諺所云
一中遮百醜矣琚出社自思祖父俱薄宦二弟年少
一尚未室我家世清白斯人何發此言此必屬吾閭
閻事然我家中無他人惟妹夫秦東軒居前院得無

與吾室人姦耶步歸家卽取其父宦車上劒入房梓
其妻用刀亂斫妻口中猶喃喃問何事頃之頭面俱
爲血污斃矣後孫氏弟孫悌訟之然亦以有二子故
難干檢視并訊官及同邑諸生以其勤學憐之事得
原夫郝琚耻其妻淫污之故拔劒殺之亦似有男子
氣情誠可原但以一戲謔無憑之語毫不檢察遂傷
妻命何其孟浪至此至于嘲謔者以一語致人殺妻
尤可恨也事已久定矣可奈何特奪其歲廩亦足以
少洩冤菟之忿予可搢手報女鬼矣然竟以事涉幻
怪不欲言之屬意長李公次溪憲副嚴公春門賓酒

桓邀予私語以夢而左右多禹城人充臬司吏者皆稍稍聞之閱數日嚴公告予曰異哉日來所言郝生事禹城人復與予道之甚悉大略謂孫氏旣死一年餘忽至其家常聞其聲或并見其形來甚忿且哭且言詈其夫曰我家世仕宦爲士人女粗知禮義旣至汝家辛苦支持供汝讀書養育二男汝作好秀才向人頭上立我豈不知體面作不肖事卽有之亦當密察的實上有公姑中有諸叔下有奴隸旁有四鄰細細詢訪豈無影響旣得實跡殺我何遲且我實不肖縱令汝碎所萬段乃我自取我亦不怨如何聽狂且

之言不分黑白將我膏血塗地使我生遭失節之名
先爲含冤之鬼割肉傷心九泉不忘今者天日在上
汝豈不知我早晚訴之冥司令汝金木纏身乃復希
望前程耶汝勿謂蹇宗師考汝二等當復廩我當訴
汝不令汝復也一家盡聞琚不勝唏第不知所謂蹇
宗師者何云然聞不令復廩殊憂之諸友爲郝生謀
曰曷哀告其父令其父來分解鬼必聽之遂如言懇
其父其父至呼其女名卽應因語之曰自兒亡後念
兒死得甚苦我老眼痛哭欲枯但汝夫一時錯疑致
汝含冤事已往人鬼路異汝朝夕擾擾他家不得安

不聞兒欲伸訴不令復廩渠家貧困靠廩支持且汝
有兩兒渠父復廩若有寸進家計稍裕略治田宅以
貽兩兒不然汝兒在世衣不周身食不充腸縱汝在
九泉之下心中何忍汝是賢女當聽我老人之言郝
琚逆理傷情誠不足憐百凡念兩兒在世我年老不
忍見外孫零落汝其詳之言罷嗚咽鬼亦嗚咽答曰
阿公言豈不是但兒素性貞良被人無故殺墮空抱
不白之冤兒名節亦重如何顧得兩兒我冤不報人
將爲實有淫迹兩兒便是淫母所生在世反不如死
兒已訴之真司憐我許我報怨阿公勿復再言父知

不可奪遂還後聞代督學者爲公郝生已膽落矣及後考居二等應復廩而督學不准復人皆以爲冥報所致而女鬼之言果驗禹城人之言若此照禹城入尚不知公因女鬼之訴而誄之也異矣予備聞嚴公之言而太息曰方女鬼言時予尚爲東州守也不惟我之督學定卽生之考二等亦定矣予是時不惟知幽明之玄通而且知人士之一進一退真斷斷乎有定數無疑也明年移官江南道出禹城有二新孝廉迎于郊詢郝瑒事其言如嚴公而更詳自發案後瑒復見婦來索命一夕自縊死予是時益信作無鬼論

者之妄而大寬之必報爲可畏也因歸舟中草一記
以爲世戒書而篋藏于家屬楊酋之變總囊零落化
爲灰燼邇年以來都不復省記今姑語其事于父未
可以告人也予曰今聞之猶令人病悸也然惟公聰
明正直其精誠足以通徹幽明故鵲亭之枯骨仰祈
申雪以抒其憤非偶然也若夫朋友聚首不可輕爲
戲謔至于人言不可輕信忿不可輕發鬼神不可不
畏定命不可不安具見太保唾咳之中予遂次其語
以爲志俾後之人觀覽焉

書遊山豪爽語

遊山次有友人云先上山時予向草中熟眠一覺甚快予曰公欲以一覺點綴山景耳非真睡也予親見公目未合耳其人大咲予曰凡古來醉後弄風作顛者固有至性其中亦有以爲豪爽而欲作如是態者若阮籍之醉王無功之飲天性也米元章之顛有欲避之而不能者故世傳米老辨顛帖而世乃以其顛爲美欲效之過矣雲林之癖潔正爲癖潔所苦彼亦不樂有之今以癖潔爲美而效之可嘔也昔有一友人以豪爽自喜同入西山時初春乃裸體跣足入玉泉山裂帛湖中人皆詫異之彼亦沾沾自喜過數載

予私問之曰卿往年跣足入裂帛湖可稱豪爽其人欣然予再問之曰北方初春冰雪稜稜入時得無小苦耶幸無欺我其人曰甚苦至今冷氣入骨得一脚痛病尚未痊也當時自爲豪爽爲之不知其害若此然則世上豪爽事其不爲裂帛湖中濯足者寡矣

菩薩二乘說

住德山龍君超偶問菩薩二乘之同異予曰二乘與菩薩歷然兩途四果至辟支皆二乘也皆取有餘涅槃者也從十信十住十行十回向以至初地二地及十地等妙二覺皆由菩薩成佛者也皆取無餘涅槃

者也二乘怖畏生死急于脫離故佛譏此輩如麀獨
跳不顧後羣惟菩薩悲智行願歷生死而不疲厭直
至成佛二乘惟住化城菩薩終住寶所二乘除糞菩
薩則明知已爲長者子二乘住羊鹿等車菩薩則取
露地白牛最上一乘若皆如聲聞二乘則佛種斷矣
如長沮桀溺荷蕢大人之流獨立高山之頂甘與麋
鹿爲羣卽是二乘根器若夫子欲立欲達天地萬物
一體卽是行菩薩行今儒者所訶虛無寂滅正佛所
訶儒者未細心看釋典宜其不知耳二乘從戒定上
起菩薩從慧上起十信首位卽生如來家爲佛嫡子

故謂之圓頓然圓中不礙行布階級歷然蓋信位卽得金得金之後漸爲四天王頭上金冠漸爲帝釋天頭上金冠漸爲大梵天及色界諸天頭上金冠金體是一故曰圓融金冠漸貴故曰行布今參學之後悟明佛性卽是得金因中涅槃與果上涅槃豈得頓同也

飲酒說

已酉長夏阻風東流晏坐舟中予思到舟中以來已近一月矣耳目清寂毀譽是非不到應酬減少生平飲酒不喜晝飲一飲則終日昏昏夜飲亦不喜多多

則夢寤不安次早神思不爽甚則助發淫嘆明知其
爲苦趣然居人世以此爲禮見予素有酒名一席不
飲則主人訝之不得已強爲之飲飲至漸多則已先
欲飲又不待主人勸矣俗所云下坡酒也予不幸有
此病未能逃世既不容戒易流之性又復難節其實
敗德傷生害我之學道者萬萬必出于酒無疑也往
事無論丁未居漁陽督府署中每夜取酒兩小瓶付
之小奚讀書至二更則飲飲至一小瓶後便有醉意
醉中粉壁上見自影鬚髯鬱然舉箸後則鬚亦連動
不止顧而大咲其寂寞如此然半醉後拍拍滿懷酣

適不可言喻大都漁陽密邇薊鎮薊酒與易酒皆佳
可飲也惟與蹇大司馬飲則常不支蹇全不擇酒酒
或遇暑而敗者都不擇一吸而盡每飲止一吸卽以
杯向下曰乾頗爲其速所困一日對飲子已大醉熟
眠而大司馬復出立松影下呼子侍兒云傳語汝主
人我正醒何辭臥耶汝記我半夜猶來此無半點酒
意明日切莫向我論量也次日蹇公苦頭眩不能起
延醫視之然予知是病酒私謂其令子曰尊大人病
至午後卽愈矣已而果愈追思此老之興致與其憐
才何可得也今亦化去矣嗣後予以老人不宜過飲

密令所親止之不復出予每夜但小飲以爲常故予
居署中讀書多著述富而學道時有透徹者以應酬
絕而飲酒少也後入都門爲酒席所困出春明門如
釋重負及歸家亦然凡入郢至石首及澧浦花源間
皆無可柰何不別諸友逃去惟近來入舟一月中不
飲酒夜飲數杯臥脾胃調適人見我好居舟中不知
舟中可以養生飲食由已應酬絕少無冰炭攻心之
事予賦命奇窮然晚歲清福延年益筭之道或出于
此不然常居城市終日醺醺旣醉之後淫念隨作水
竭火炎豈能久于世哉故人知我之爲逍遙游不知

其爲養生至也近日精神爽健百病不生甚以自幸
留此幻軀尚有別事可作因喜而書之

書繼洲及對山事

族兄繼洲名秩宗業儒不得志于場屋中年學道家
言飲食起居極其謹慎後又學禪有育禪語之曰禪
惟悟性而已一切情慾當恣爲快樂于此原無妨礙
繼洲欣然從之飲啖任情且多不戒衽席久之遂病
嘆曰使我常學養生言病不至此有禪啟我以事事
無礙之旨未免恣意任習本爲放下却成放逸知拘
檢爲非不知流遁尤錯而今而後知古人戰戰兢兢

臨深履薄是吾人保命符已矣已矣育師誤我也遂
卒當病時予親往問病耳聞之故紀于此繼洲爲人
質直溫良一族有事皆就而折衷焉後無子子其兄
對山名惇宗子天道不可知乃爾惇宗爲農起貲財
幾至萬金市膏腴田千頃晚修淨業每聞中郎與子
一言則服膺終日常語人云他二人大聰明人言必
可信故晚年勤修西方去時甚分明今日泊舟輞湖
見兩兄庄上松樹鬱然偶念及之故書

書王尚甫事

王尚甫名承燧爲予表兄少失父母貧苦依子兄弟

中郎亦甚憐之奔波終日稍泊一宅中郎去世其下
斷腸之淚者親戚中惟尚甫耳予年來無伴侶又僻
處後園惟尚甫時時往來寒暑不輟予有重病尚夫
聞之或夜不交睫爲人性燥又不慎口故多招尤毀
然高下在心非憤憤者亦知叅禪有解語其臨終口
喃喃惟說佛乘去時命妻子無哭泣但爲我念佛自
亦念佛不輟而逝初字質夫黃平倩過公安字之曰
尚夫都不解其意久之乃知質夫之兄貌似圓圓故
人以王圓呼之尚夫者小圓也尚夫一日酒中語其
兄以明曰人言弟貧不知我之襟懷富翁某甲子以

千金見鬻不與也以明咲而識之歲餘尚夫窘極謀于以明曰衣衫俱已典盡更無一物可典當奈何以明曰弟有一物減價鬻之亦大可治生何爲自窘尚夫徧覓家中所有不得苦求說之以明曰卽弟向日不鬻與富翁之襟懷也聞者大咲尚夫辯有口予嘗謂之曰尚夫使子生于戰國時逐蘇張之後唾取富貴何難哉中郎家居時甚狎尚夫相對日夜不厭蓋亦久而緣熟相見無主客之煩任情語話以破一時之岑寂耳尚夫十許歲時與中郎及予同學予問之若昨往妻家曾竊見妻回否尚夫曰描也描不成豈

也盡不就凡人問之卽以此二語答後三十餘年中
鄧偶憶此語大書于尚夫所居之粉壁上其子已生
鬢矣問尚夫二伯何爲寫此二語尚夫笑而不能答